

Kriste o be a swanetše go hlokofatšwa

Thero mo Mareka 8:31-33

Palo ya Beibele: Mareka 8:27-9:13

Temanathero: Mareka 8:31-33

Tabataba: Molaetša wa Ebangedi ke gore Kriste o be a swanetše go hlokofatšwa

Kriste o be a swanetše go hlokofatšwa. Wo ke molaetša wa temana ya rena. Tšeo ke ditaba tše botse tša Ebangedi – le ge go le bjalo mohlomongwe se kwagala e le kganetšo. Ditaba tše botse ka ga go hlokofatšwa ga Kriste. Ke gogonyane gore Petro a ganetša taba ye ka boyena. Mohlomongwe ke gobane o be a le moetapele wa barutiwa, a iša Jesu ka thoko lebakanyana, gore a bolele le yena. Ka nnete o be a na le hlomphe go Jesu kudu, empa lebakeng le e be e le phetišo. Temana ya rena e re Petro a thoma go sola Jesu. Re ka kwa le Petro gore gobaneng a be a dira se. ka nako tše dingwe go bonala go swanetše gore o lemoše morutiši. Ana a ka bolela dilo tše bjalo ka ga yena? Ana ga a fetiši polelo? Yena, Messiah wa Isiraele, Kgoši, mojalefa wa bogoši bja Davida, gobaneng a le ka tsela ye, ge a re: o swanetše gore a hlokofatšwe ka go gontši le gore o tlile go lahlwa? Lebelela, Petro o be a ka gopola gore mohlomongwe Jesu ka motsotso wo o be a ne la dipelaelo, a bolela ka boyena, mohlomongwe o be a boifa tsela yeo e tlogo, gore tsela ya gagwe ya go iša bogošing ka dinako tše dingwe e tlile go ba boima. Mohlomongwe o tlile go gatelelwa ka seo. Empa lebaka la gore Jesu bjale, phatlalatša a ba tsebiše gore yena o tlile go lahlwa e bile a bolawa – aowa seo ba ka se se theetše. Seo ga se kgonagale! Selo se se bjalo se ka se kgone go diragala mo go Messiah, go kgoši! Go fetiša mo, ke Yena moporofeta wa Modimo!

Ana, o a tseba, ka mokgwa wo Petro a gopolago ka gona go swana le tsela yeo Mamosleme ba naganago ka ga Jesu. Go ya ka puku ya Korane, puku e kgethwa ya Mamošeleme, moporofeta wa Modimo a ka se kgone go hlokofatšwa, seo ga se kgonagale. Moporofeta o dula e le mofenyi. Gomme seo ke seo Korane e se boelago ka ga Jesu. Jesu - go ya ka Korane – ga se a ka a hlokofatšwa le gatee. E bile ga se a ka a bapolwa. Korane e re: e be e le phošo – batho ba be ba gopola gore o bapotšwe. Empa legato la gagwe go bapotšwe motho yo mongwe – motho yo a bego a lebelela bjalo ka Jesu. Bjale gobaneng Korane e bolela ka tsela ye? Gobane go ka ya ka tsamaišo ya Mohamed tumelo ya moporofeta a ka se kgona go hlokofatšwa. Moporofeta ka boyena ke motho e mogolo. Gomme ka lebaka leo Mohamed o re: seo Beibele e se boelago ka ga Jesu ga se nnete – e bile a ka se kgona go gopola gore seo e be nnete – moporofeta eo a hlokofaditšwego e bile a bapolwa. Go ya ka kgopolo ya gagwe moporofeta wa Modimo a ka se kgone go fenywa. Moporofeta a ka kgona fela go fenywa lefase.

Go boela mo temaneng ya rena – Petro ka lebaka leo o be a na le kgopolo ye. Gomme mohlomongwe le barutiwa ba bangwe ba be ba gopola ka tsela yeo. Ba be ba sa kwešiše labaka la gore Morena wa bona wa go ratega a ka hlokofatšwa. Yena – yo a bego a na le maatla, yo a bego a kgona go dira mehlolo ya go makatša!

Empa, se ke boteng bja molaetša wa Mareka, gabotse wa Beibele ka moka. Ke molaetša wa hlokofatšo. Se ke SEPHIRI se segolo, gore Modimo o tsebagaditše Kriste go batho. Sephiri seo e lego gore sebe se fenywa ka boikokobetšo. Gore Modimo o neetše morwa wa gagwe a nnoši bjalo ka mophološi, bjalo ka sehlabelo legatong la rena. Sephiri se se ile sa tsebišwa gomme ya ba moriti wa dihlabelo ka moka tša Testamente ya kgale. Diphoofolo ka moka tšeo di bego di hlabja madi a tšona ka moka a be a sa kgone go tloša sebe le bobbe ka moka. Dihlabelo ka moka e be e le peakanyo ya lebakanyana fela go fihlela mohla Kriste a etla. Sehlabelo sa gagwe sefapanong se tlositše sebe. Seo ke sephiri sa Modimo seo re ka se kgonego go se kwišiša ka bohlale bja rena. Ga go phenyo ka go laetša gore o na le maatla, empa ka go laetša bokowa. Ka bokowa bja gagwe maatla a gagwe a ile a bonatšwa. Ka kgotlelelo ya gagwe. Kriste o be a sa lekwe ke sathane gore yena a itelwe ka matsogo a gagwe. empa o hlokofaditšwe

ka go ineela. O tlogetše kahlolo diatleng tša Tate wa magodimong. Gomme bjalo ka ge Modimo Tate wa magodimong a ahlotše: o be a swanetše go hlokofatšwa legatong la rena. Ka motsotso wo Petro o be a sa kwišiše selo. O be a sa lemoge sephiri sa Modimo. Gomme ka lebaka leo a kgalema Jesu. A sa tšebe lebaka la gore ka tiro ya gagwe o be a thibela peakanyo ya phološo ya Modimo!

Re a tseba gore dilo di sepetše bjang ka morago ga se. ka morago ga gore Petro a kgaleme Jesu, Jesu a lebelela go yena gomme a kgalemela Petro gagolo. Tloga go Nna, sathane! Ga o ne kgopolo ya Modimo mo go wena, empa kgopolo ya batho! Empa Petro ga se a ka a hlaloganya se. re badile le temana yea e tlogo ka morago ga temana ya rena, yeo e bolelago ka ga phadimo mo tabeng. Gabotse se se laetša go ineela ga Jesu mo go barutwana ba gagwe. mo phadimong ye Petro o ile a bona Jesu a na le Moshe le Elijah. Banna ba babedi b a ba be ba tšewa bjalo ka bao ba nago le maatla a magolo ke Bajuda mo Testamenteng ya kgale. Gomme mo lebakeng le barutiwa ba ba bona ba bolela le Jesu ga bonolo. Gabotse, se e be e le sešupo go bona gore Jesu a ka se kgone go ba le phošo. Ge e ka be Jesu a na le phošo – banna ba babedi ba ba ka be ba mo kgalemele le bona. Empa seo ga se a direga. Gomme barutiwa ba be ba swanetše go amogela molaetša ka ga Jesu' hlokofatšo le ge ba be ba sa hlaloganye selo.

Moporofeta wa Modimo o be a swanetše go hlokofatšwa. Gabotse, ge o bala Testamente ya kgale ka hlokomelo, molaetša wo o tlile go o humana gona mo! Ana se e be e se ona molaetša wa baporofeta ba nnete Testamenteng ya kgale? Go tloga ka madi a Abele, moloki, go fihla ka madi a Zakariah, morwa wa Berechiah, yena yo a ilego a bolawa ke batho ba nago le maatla. Empa bjalo ka ge boletše, ke mo go motho re gopole ka tsela e šele. Re humana e le go šele gore re ka bitša moporofeta gore a hlokofatšwe gomme a bapolwe gomme a hwe. Empa, gape se ke sona sephiri sa Ebangedi. Ke sona boteng bja yona. E sego ka tšhomišo ya maatla go fenya lefase, empa ka lerato la Modimo. Ga go seo se ka bonatšago lerato la Modimo go fetiša lebaka la go romela morwa wa gagwe a nnoši. Sehlabele sa Morwa wa gagwe e be e le tsela ya phenyo mo go lehu le sebe le sathane. Kriste o bile sehlabele sa lehu ka boyena. O hwile mo legatong la rena. Empa lehu le be le sa kgone go mo swara go fihlela. Se ke yona Ebangedi. Mang le mang eo a ganetšago gore Jesu o be a swanetše go hlokofatšwa le go hwa gomme a be sehlabele legatong la rena, mang le mang yeo a ganetšago bonnete bjo ga se moKriste, e bile ga a na kgolagano le peakanyo ya phološo ya Modimo.

Re a tseba gore go na le ditumelo tše dintši mo lefaseng. Batho ba bangwe ba re ditumelo ka moka di na le molaetša wa go swana. Le gore ga go re selo gore wena o dumela tumelo efe. Empa Modimo o re ruta selo se sengwe mo Beibeleng. Go na le tumelo e tee ya nnete, gomme go na le ditumelo tše dintši tša maaka. Ana o ka lemoga seo bjang? Go ya le gore ana wena o reng e bile o nagana eng ka ga Jesu Kriste. Le seo a se direlego. Ge o dumela mo Jesu Kriste, gomme wa ipolela gore ke thato ya Modimo gore o be a swanetše go hlokofatšwa le go bapolwa le go hwa ka lebaka la dibe tša ka, le gore o ile a tsoga bahung gomme ge go le bjalo o na le tumelo e tee ya nnete. Tumelo ya e a go kokobetša. Gobane o swanetše go ipolela dibe tša gago, gore seo se dirile gore Kriste a hlokofatšwe. Tumelo ye e dira gore o be le boitumelo le lethabo, gobane o a tseba e bile o a bona gore wena o wa ga Jesu Kriste! Ka kgaugelo ya gagwe o go phološitše! Seo se fapana le ditumelo tše dingwe.

Mo go Islamo Mohammed goba Allah a ka se kgona go go phološa. O swanetše go dira ka bowena. O swanetše go dira ditiro tše botse, tšeo di bolelwago. Go ya ka bowena, ga go kgaugelo. Empa tumelo ya nnete, bjalo ka ge Beibele e re utullela, e re ruta ka ga kgaugelo. Modimo wa kgaugelo, yo mo Testamenteng ya kgale a seaka a otl batho ba gagwe, empa ka nako yeo o be a kgotsofatšwa ke dihlabele tša diphoofolo lebakanyana di tloša sebe ka madi a diphoofolo. A gopotša batho ba gagwe ka dibe tša bona, empa a ba dumelela go tšwelo pele go phela, gomme a ba šegofatša. Gomme mo go Testamenteng e Mpsha, yena Modimo yo wa kgaugelo o rometše Morwa wa gagwe a nnoši, madi a gagwe mo sefapanong, e bile sehlabele sa bofelo, gomme re phološwa ka Yena. Mang le mang yo a dumelago go yena ka nnete o tlile go phološwa. Wo ke

molaetša o botse! kgaugelo go modiradibe o mogolo! kgaugelo, go morutiwa Petro, yo a ganeditšego Moruti wa gagwe makgetlo a mantši. kgaugelo go moapostola Paulo, yo a bego a hlokofatša Bakriste pele ga ge Jesu a iponatša go yena. kgaugelo mo go nna le go wena!

Amene.